

EVANS, WILLIAM ('Wil Ifan', 1883 - 1968), gweinidog (A. Saesneg), bardd a llenor yn Gymraeg a Saesneg

Enw: William Evans

Ffugenw: Wil Ifan

Dyddiad geni: 1883

Dyddiad marw: 1968

Priod: Nesta Wyn Evans (née Edwards)

Plentyn: Nest Evans

Plentyn: Mari Glyn Jones (née Evans)

Plentyn: Brian Evans

Plentyn: Elwyn Evans

Rhiant: Mary Evans (née Davies)

Rhiant: Dan Evans

Rhyw: Gwryw

Galwedigaeth: gweinidog (A. Saesneg), bardd a llenor yn Gymraeg a Saesneg

Maes gweithgaredd: Crefydd; Eisteddfod; Llenyddiaeth ac Ysgrifennu; Barddoniaeth

Awdur: Gerallt Jones

Ganwyd 22 Ebrill 1883 yng Nghwm-bach, Llanwinio, Sir Gaerfyrddin, mab Dan Evans, gweinidog (A) Hawen a Bryngwenith wedyn, a golygydd *Y Celt* am gyfnod, a Mary (ganwyd Davies) o Gwm-bach, Llanwinio. Graddiodd (B.A., 1905) ym Mhrifysgol Cymru, a bu hefyd yng Ngholeg Manchester, Rhydychen. Gwr galluog ydoedd, eithr nid awyddai am ddisgleirdeb addysg, ac er ei fod yn bregethwr coeth, efengylaidd, ni chwenychai fynd i 'gyrddau mawr'. Yn wir, gwrthodai gyhoeddiadau felly, eithr yr oedd yn anwyl yn pobl ei ofalaethau. Gwasanaethodd fel gweinidog (A) yn Nolgellau, 1906-09, Pen-y-bont ar Ogwr, 1909-17, Richmond Road, Caerdydd, 1917-25, a Phen-y-bont drachefn, 1925-49. Fe'i gwnaed yn Pastor Emeritus gan ei hen eglwys dros weddill ei oes. Priododd â Nesta Wyn, merch John a Catherine Edwards, Eirianfa, Dolgellau, 28 Rhagfyr 1910 a bu iddynt bedwar o blant: Elwyn, Mari, Nest a Brian. Bu ef farw 16 Gorffennaf 1968.

Ymddisgleiriodd fel un o feirdd a llenorion mwyaf amryddawn Cymru. Yr oedd yn ddramodydd, newyddiadurwr, darlledwr, darlithydd, bardd telynegol o'r awen wir yn Gymraeg a Saesneg; yr oedd hefyd yn arlunydd campus ac yn gerddor. Enillodd rai o brif wobrau eisteddfodau taleithiol Cymru a choron yr Eisteddfod Genedlaethol am bryddestau deirgwaith: Y Fenni, 1913 ('Ieuan Gwynedd'); Penbedw, 1917 ('Pwyll pendefig Dyfed'); a Phwllheli, 1925 am ei gân enwocaf, 'Bro fy mebyd'. Beirniadodd droeon yn yr Eisteddfod Genedlaethol a bu'n Archdderwydd Cymru yng Ngorsedd y Beirdd, 1947-50. Yr oedd yn awdur toreithiog yn y Gymraeg a'r Saesneg. Ymysg ei gyhoeddiadau niferus ceir cyfrolau o gerddi: *Dros y nyth* (1913), *Plant y babell* (1922), *Haul a glaw* [1938], *O dydd i ddydd* (1927), *Y winllan las* (1936), *A quire of rhymes* (1943), *Unwaith eto* (1946), *Difyr a dwys* (1960); dramâu: *Etifedd Arberth* [1937]; ac ysgrifau: *Here and there* (1953), *Y filltir deg* (1954), *Colofnau Wil Ifan* (1962).

Awdur

Y Parchedig Gerallt Jones, (1907 - 1984)

Ffynonellau

Gwybodaeth bersonol

gwybodaeth gan ei fab, Elwyn Evans

Barn, Eisteddfod, 1983

Darllen Pellach

Erthygl Wicipedia: [William Evans](#)

Gweithiau

E. Vincent Evans (gol), *Cofnodion a chyfansoddiadau Eisteddfod Genedlaethol 1917 (Birkenhead). Rhan 1, Barddoniaeth (Caerdydd 1917)*

Dolenni Ychwanegol

VIAF: [19462766](#)

Wikidata: [Q3400194](#)

Dyddiad cyhoeddi: 1997

Hawlfraint Erthygl: <http://rightsstatements.org/page/InC/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

